

COMMUNICAZIUN A LAS MEDIAS

Bever, ils 11 da zercladur 2025

L'emprima badigliada per sanar l'implant electric da Silvaplauna

Las lavurs da construcziun per sanar l'implant electric da Silvaplauna han cumenzà. Ils responsabels han festivà dacurt l'emprima badigliada. Repower vegn a renovar a moda cumplexsiva l'implant en l'Engiadin'Ota, da la tschiffada d'aua fin a la turbina. L'interpresa investescha en total 8,6 milliuns francs en la renovaziun.

Ils emprims edifizis da l'implant electric a Silvaplauna dateschan da l'onn 1890. Dacurt han ils responsabels pudì festivar sper la tschiffada d'aua Ova dal Vallun l'emprima badigliada per la renovaziun cumplexsiva da l'implant - en preschientscha da Daniel Bossard, il president communal da Silvaplauna, Guido Giovannini da l'uffizi da construcziun da Silvaplauna e Curdin Barblan da l'Energia Engineering SA. Da la partida èn era stads dus collavuraturs da Repower, numnadain Andriu Maissen sco manader general dal project e Michael Roth sco commember da la direcziun. L'implant electric renovà cumplettamain duai vegnir mess en funcziun la primavaira 2026.

Per pudair gestiunar l'implant electric er en l'avegnir a moda segira e fidada investescha Repower 8,6 milliuns francs. La tschiffada d'aua existenta sur il vitg vegn deconstruida e remplazzada cun in implant modern e pli ecologic. Ultra da quai èsi previs d'installar in nov conduct da transmissiun da la tschiffada d'aua fin al reservuar e da construir da nov ina part dal conduct da pressiun. En la centrala a Silvaplauna vegn la gruppa da maschinas veglia remplazzada cun ina maschina nova pli effizienta. Er ils sistems da protecziun e da regulaziun vegnan modernisads.

L'implant electric cuvra in terz dal basegn d'electricitad da Silvaplauna

L'implant electric da Silvaplauna dispona d'ina prestaziun dad 1,5 megawatt. Cun ina producziun annuala da var 5 uras gigawatt cuvra ella stgars in terz dal basegn d'energia total da la vischnanca da Silvaplauna. La radunanza communal da Silvaplauna ha decidì il 2024 da prolungar fin l'onn 2105 la concessiun per l'utilisaziun da l'aua. Questa prolungaziun sto uss anc vegnir approvada da la Regenza grischuna en il decurs dals proxims mais.

Contact

Stefan Bisculm

manader dal post da medias

t +41 81 423 78 73

m +41 79 372 77 76

stefan.bisculm@repower.com

Quai è Repower

L'interpresa Repower è dapi 120 onns activa sco producenta d'electricitad, manadra da la rait da distribuziun e commerzianta d'energia. Ses martgads-clav èn la Svizra e l'Italia. La sedia principala sa chatta a Poschiavo. Ulteriuras filialas ha ella a Bever, Glion, Grono, Küblis, Landquart, Turitg e Milano. Repower è activa lung l'entira chadaina da valorisaziun da l'electricitad, da la producziun sur il commerzi fin a la distribuziun e la vendita, ed er en la fatschenta da gas. Repower è la pli gronda interpresa da provediment d'energia en il chantun Grischun, nua ch'ella posseda e gestiunescha pliras ovras idraulicas. En l'Italia è Repower ina da las pli grondas furnituras d'electricitad e da gas per interpresas. Il portfolio da l'interpresa en l'Italia cumpiglia plirs parcs da vent e parcs solars ed in'ovra electrica cumbinada cun gas. Mantegnair ed amplifitgar las energias regenerablas è ina part integrala da la strategia da Repower. Quai vala era per il svilup persistent da l'interpresa en ils secturs economia, societad ed ambient.